

海陽縣志卷四十

列傳九

傅修

子玉林

李芳園

邱耀德

邢九維

劉祖謨

謝夢春

張中陽

邢雄高

陳鳴鶴

吳烈

鄭重暉

原名昌時

邱步瓊

倪明進

子元藻

楊開會

呂玉璜

楊遇恩

子淞

海陽縣志

卷四十

列傳九

一

林恆亨

子士騏

郭迪道

子廷集

林成名

朱光鼎

黃朝恩

楊仁風

李從龍

鍾鴻達

兄靈

李元順

陳方平

已上

國朝

國朝

傅修字俊成號竹漪明御史天祐裔世居上莆至父徙浮洋以貧

懋遷生修於龍溪庵埠幼穎異讀書過目成誦叔父榮萬慮其窮

或輟業常資之年十六補弟子員乾隆壬午領鄉薦挑發山西補

山陰令潔已愛民循聲卓著薦陞直隸遵化州牧遵化重關深隘

畿北要區修撫綏得宜邊民悅服踰年擢知大名府旋移守保定賑恤饑民不遺餘力事達

天聽遷山西冀甯道未幾署按察使兼權布政使

特旨調任直隸按察使時連平顏檢方督畿輔知修廉能諸事悉與商推修知無不言相得甚歡粵東距京八千里公車報罷南還者每苦旅費不足凡謁修修皆殷勤留署以俟再舉一月會文數次公餘親校閱或封送京中名輩評鶩當曰款留八人先後皆成進士嗣因軍機大臣兼管順天府尹某欲曲保其鄉人爲京縣制軍顏檢不允會奏某恨極多方傾陷檢並齟齬修

上憐修才然不欲廢吏議迺落修職發往江蘇以知州用修略無

海陽縣志

卷四十

列傳九

一一

愠色怡然就道江蘇大吏稔修名聞其來喜甚甫到省卽假守揚州治揚一如治保定歌來暮者徧四境適權貴某入都道出維揚密遣所私諷修餽送代謀復職修笑謝曰予入仕數十年未嘗夤緣干進豈至老而喪其守耶某聞而銜之入

覲時

上果垂詢修近狀某以老耄不堪任事對修遂不獲召用嘉慶壬申卒於官年七十四囊無餘資僚友伙助始成殮妻子無力歸櫬故鄉迺葬修於所茆處而寄居甘泉長子玉林字曉山舉乾隆甲寅京兆試乙卯成進士知閩之福安縣革陋規恤民隱勤吏治逾歲入爲吏部郎中縣民攀轅臥轍奔走省會乞留格於例不行玉

林以名父子爲

仁廟賞識至京兼充圓明園差官日從事牽馬以體弱不任勞遂得疾卒孫延燾巖俱領順天鄉薦延燾歷任浙江錢塘秀水知縣

巖出知山東壽光縣

據李柱蘭撰傳修

李芳園字開與少有遠志諳子史明韜略襟懷磊落卓然有文武才乾隆壬午舉於鄉登丙戌會魁點傳臚授侍衛趨從殿右旋授江蘇城守參將轉浙江臺州副將時臺灣林爽文作亂渠寇猖獗經略大帥福康安調芳園鎮守金廈芳園星馳赴命整戎行察形勢以其地向無城郭故民居悉罹焚掠乃請築城池分割營伍且守且戰逆黨聞風畏避然復由漳攻臺芳園遣族姪哲假作臺商

海陽縣志

卷四十

列傳九

二二

深入賊巢探諸機密作表裏合應之計臺寇遂平以功

欽賞花翎實授金門總兵官兼署提督廈門水師軍務在金廈恐醜類復萌時常巡哨海濱忽於巡船得暴疾卒芳園居官廉不取陋規不攜親眷到署當扶櫬歸宦橐蕭然僅存翰墨數幅所著有平臺遺策因其孫大白以把總勞王事溺雲澳海中失傳

據採訪冊修

邱耀德字榕莊家貧篤學凡經義訓詁莫不研究由拔貢登乾隆乙酉鄉薦官貴州畢節知縣體恤民隱斷事不避權貴因此得罪大吏解組歸觀察胡克家贈以聯云臨事無疑知道力讀書有得覺身閒所著有易辭訓纂未梓卒

同上

邢九維字敘疇有文名設帳郡城從學多知名士陳解元昌期出

其門乾隆乙酉舉於鄉出宰河南歷署闡鄉桐柏長葛等縣事薦署南陽同知督理黃河

欽賜彩緞補授靈寶縣知縣居官勤政事案無留牘甲子卒於官著有三鱸堂文集四卷同上

劉祖謨家貧喜讀書湛深經術領乾隆庚寅 恩科鄉薦三上春

官不售遂絕意進取家居課徒自給視榮利泊如也生平勤於課述嘗以六經箋註雖繁尙多疑義旁摻載籍攷其異同而折衷

御纂之說著周官集解儀禮集解公羊傳釋義穀梁傳釋義等書

共若干卷藏於家

同上

謝夢春字鶴堂又字碧堂勵志苦學乾隆癸卯進士授偃師縣知

海陽縣志

卷四十

列傳九

四

縣偃師地瘠民貧又居要衝官苦乏而供億煩夢春泣任吏以陋規進笑不受大吏按臨夫役供給費甚鉅夢春不派民一錢虧帑

變家產抵之及解組歸四壁蕭然

同上

張中陽字旭初少失怙勵志力學弱冠冠童子軍登乾隆乙卯賢

書嘉慶戊辰成進士出宰貴州歷任銅仁婺川畢節興義等縣事

陞黃平州知州到處有聲以課最擢刑部主事年七十致仕僚友

饒別車盈門陳相國官俊吳殿撰信中各賦詩贈行

陳詩云舊結芝蘭契同門

君最豪盛名齊雁塔小割試牛刀善政西南遠明刑旦夕勞年來多道氣兼祝百齡高 良醫功比相榮衛久分明忠孝心無愧岐黃術又精公餘常靜坐老至更忘名 近遂山林興神仙羨地行吳詩失傳 時人方之二疏中陽先由江

東都移居郡城江東四面濱水隄屢潰及歸家力倡修築鄉人賴

之年七十八卒於家

同上

邢雄高膂力過人由行伍拔補把總乾隆丙午隨高廉鎮梁征臺
灣逆匪在蔦松庄竹篙厝等處屢獲勝仗陞千總署潮鎮左營守
備嘉慶元年春奉調隨征楚南苗匪收復乾州又隨剿鴉溪大波
墊大壩坪各苗寨時苗匪據險死守雄高奮勇直前殲戮無算以
功保奏

賞戴花翎嗣攻三益坪要隘克竹山坡進取平瀧乘勝深入險阻
爲苗匪所扼力戰死二年大吏奏

聞詔賜卹贈雲騎尉世襲罔替

同上

陳鳴鶴字和之襟懷瀟灑才學優長由拔貢生官萬州學正談經

海陽縣志

卷四十

列傳九

五

課士翛然自適時有三豪之稱謂下筆吟風如天馬行空以詩豪
舉杯邀月如長鯨吸川以酒豪胸無宿翳高談雄辯四座皆驚以
人豪與同郡林日華友善詩章唱酬無虛日及聞其卒鬱鬱不樂
而豪亦漸減解組歸卒於家著有耕心堂牘稿

同上

吳烈猿臂善射自弱冠起家行伍嘉慶丙辰丁巳閒官雲南丁苗
役嘗雪夜破苗洞洞口奇峯峻削稠疊且十里烈單刀往僅用十
數健兒鞭匹馬尾其後密令曰爾曹可去予百步行可尤健者數
人接予踵予至洞口發火鳴金隨予大譟苗子潰亂不俟大軍至
也時歷守更廠數所人皆避雪臥巒中其在外守更鳴鑼卒烈至
輒刃之乃自留一卒代鳴更鑼如故不更許至洞口果一譟而羣

苗潰大軍繼至盡殲之搜山三日大帥某議收兵烈曰大人止殺之心仁心也然苗子叵測不草薙獸獮倍三日搽餘黨嘯聚又將多數年役矣帥不聽後如其言當時作亂者不止一苗有曰白衣仙子者曰猱猱者曰長頭髮者皆好亂難治烈往勦皆著戰功蒙

賜翎以都閩府老

據韓江聞見錄修

鄭重暉字平階

初名昌時

幼聰敏讀書過目成誦弱冠補博士弟子員

食廩餼有聲大守黃安濤以疏治韓江水道下問重暉獻策具圖說進太守深器重之延爲東隅義塾掌教時地方多故巡撫祁墳臨潮重暉進權宜時務萬言策巡撫奇其才辟充幕府以明經終所著有說隅開方攷韓江聞見錄豈閒居吟稿行世

據採訪冊修

海陽縣志

卷四十

列傳九

六

邱步瓊字瑤林號梅坡少聰穎篤學勵品登嘉慶甲子科賢書大挑知縣歷宰甘肅漳縣秦安縣秦州知州所至有聲回籍後凡築隄甃城浚三利溪修廣濟橋設義倉以備荒歲創扶輪堂以惠士林一切善舉無不悉心籌畫道光甲辰黃悟空豎旗倡亂巡道李焯煜太守吳均延入署商辦用其謀擣賊巢平之咸豐甲寅吳忠恕亂東南諸鄉皆爲賊踞郡城危如累卵步瓊素爲人信服密告巡道曹履泰諭西路諸大族紳耆各出義勇衛城城賴以安當事急時勇糧不繼眾大譁得步瓊一言而定賊平毀家代償家人相怨曉之曰若城陷玉石俱焚今幸獲安全敢以吝惜食我言乎生平廉潔不取非分財當道重之延主城南講席前後共十六年同

治三年甲子奉

旨重赴鹿鳴宴卒年八十六祀鄉賢

同上

倪明進字千杰號晉三少慧敏嘉慶癸酉拔貢 朝考以知縣用

籤掣河南時年二十三有弱冠縣令之目歷任鎮平夏邑桐柏泌陽等縣所至多惠政而泌陽爲最修泌陽縣志倡建義學興文教士民德之爲塑像以祀戊寅充河南同考官例充同考皆甲乙榜以明經與者自明進始年四十一丁外艱歸會歲壬辰饑倡行賑濟嗣卒於家所著有中洲詩集子元藻廩生亦工詩南海詩人李長榮纂柳堂師友詩錄合喬梓詩署之曰鶴鳴集

同上

楊開會字紹志一字樸庵先世閩人有官於潮者因占籍海陽道

海陽縣志

卷四十

列傳九

七

光辛卯舉於鄉癸巳成進士授知縣乙未抵閩充同考官所得皆名下士若林編修汝舟黃主事紹芳俱連掇巍科以去大吏委審案有不能平反者卽託辭婉謝其可以直行已意者則虛衷訊問不以鞭扑示威一時稱爲明幹是冬署永安縣甫下車杜干謁緝盜賊革陋規先是永安衙蠹視控案輕重索告者金名曰湯圓錢有多至百餘元者開會出示嚴禁貧民始得赴訴每徵收恐吏役騷擾親詣鄉邨勸諭民爭輸納邑中澆俗每殺病丐於富家冒爲屍親嚇勒有林排者率四兇殺一病丐圖賴某家某家前受其害合前事訟之卽提訊三人皆吐實惟林排不認研鞫至深夜乃認按律懲辦圖賴之風遂革永安地瘠民貧多刦盜憚其精明皆避

地他徙案牘之暇尤喜培士類每月必親至書院論文勵品娓娓不倦聽講者常數百人丙申下鄉徵收中暑卒年三十八民感之爲立遺愛碑

同上

呂玉璜號小伊先自斗文移居郡城少孤其母潘恭人延師課讀與弟璣璜俱有聲庠序家豐於貲玉璜乃瀟灑出塵絕無富豪氣性耽吟詠道光閒選授曲江訓導履任數月卽解組歸圖書滿室以風雅自娛爲知府黃安濤知縣徐一麟所器重公餘輒邀唱和又與黃廣文兆榮廖茂才日昌諸名士騷壇角逐稱盛一時鎮平黃釗稱其詩冲和閒適一如其素履著有刻燭吟館詩鈔弟璣璜有雋才早逝有嚶其鳴齋詩集長子祥麟次子瑞麟俱能詩祥麟

海陽縣志

卷四十

列傳九

八

中咸豐壬子鄉榜有漱綠山房稿瑞麟廩生有綠雨窗稿邑詩學數十年來以呂氏一門爲盛

同上

楊遇恩號暉圃稟資聰穎少負遠志由國學生入貲選授山東安邱縣縣丞得大憲知俸滿舉卓異歷署朝城鉅野壽光長清博興安邱等縣事以丁內艱歸服闋選授浙江桐鄉縣縣丞旋署浦江桐廬等縣事卽由部推升授江蘇嘉定知縣任五年調署震澤縣事年六十卒於官當權桐廬時缺瘠苦廚恆不給有以私干者願贖二千金求伸其事遇恩卻之曰汝事不直雖萬金弗可奪也如直予自伸之烏用此爲嘉定爲江蘇美缺遇恩泣任五年以清虧帑至變家產抵之最後權震澤適英人犯江界一日謀者言英兵

己入泲河泲河吳江近境也震澤與吳江同城吳江令某聞信先移眷避之幕僚因以勸遇恩曰可以是爲民望乎訖不動後報者云入泲河者實漁船非兵船眾乃服其識操遇恩歷官清勤而胸次復浩落嘗假友人某三千金後還金而忘索回券某條物故越十餘年其子攜前券索逋遇恩曰我負人則獲罪於天人負我我固泰然也卒如數償之歿後囊無餘錢家屬幾不克自存子淞亦清介同治丁卯舉人預修邑志未脫稟卒著有養和山館詩鈔同林恆亨字居叡號笠舫明尚書熙春後道光戊子副榜癸卯登賢書咸豐甲寅土寇亂當道延襄軍務恆亨親歷西南各鄉勸民背賊助官分義民旂事平保獎知縣既乃改就教選授新會教諭調

海陽縣志

卷四十

列傳九

九

署番禺能勤其官月課親爲講貫解元劉子鵬進士李辰輝皆以受其薰陶獲雋在任六年歸見新進貧者無力送冊金心爲惻然乃援新會番禺成案踵行至今新進免冊金費皆恆亨力也恆亨性嚴正家居前後數十年未嘗一干外事而於地方善舉如拓建考棚助修貢院籌積扶輪堂公款無不樂爲鄉黨於是共爲推重卒年六十八子三長士騏有雋才文思奧衍中同治甲子舉人同

郭迪道字其鵬少孤有至性念父行紀早故逢諱日常歔歔流涕事嗣母林氏生母鄭氏定省維謹年至六旬猶出告反面一如少時人以爲難光緒十八年省善後局以采訪事 聞敕祀孝弟祠子廷集有幹事才總兵方耀清釐積案多委任以南隄低薄倡議

大修七都民賴之

據府冊采訪冊參修

林成名號蓉初監生慷慨仗義咸豐甲寅之亂劉財寶引賊踞東津圍攻郡城城中糧食將盡適意溪鍾英才引官軍入鄉勦辦意溪與東津毗連成名乘機率城中團勇渡韓江助勦時上岸鼓行而東賊伏叢莽中伺其過前突起截殺成名督團勇力戰見勢不利自投韓江死之事

聞詔賜恤崇祀昭忠祠

據采訪冊修

朱光鼎號毅齋貢生世居楓溪家貧設帳郡城父墓在西廂之原每歸家必造墓拜焉素行端謹淡然寡營鄉里無長幼咸欽重之巡道李煒煜稱其經明行修不爲利欲所染特設養正義塾延課

海陽縣志

卷四十

列傳九

十

孝經朱子小學爲鄉塾倡嘗赴鄉闈主司擬魁選已而撤去光鼎自是絕進取意晚年學益篤言動以禮日有所事夜必書之其於居敬爲已之功實能力行不倦云

同上

黃朝恩號石臣行伍出身道光三十年由饒平營千總署潮鎮左營守備屬本省高廉等處股匪劉八等騷動徵兵潮州咸豐元年奉檄隨征賊潰竄逐北至廣西卒獲劉八殲其黨兩廣總督徐廣縉重之二年擢守備薦擢都司時江南髮逆作亂延及兩湖徐廣縉以朝恩一軍驍勇善戰由廣西梧州調赴楚省十月抵長沙與賊接仗屢捷追至湖北武昌東門外賊築壘洪山拒守朝恩默審形勢鼓士卒上山連破十餘壘賊乃棄武昌遁去 欽差大臣湖

北提督向榮奏

聞賞金牌等物嗣遷游擊然湖北雖平而江南髮黨猶分踞鎮江揚州等處連年

廛廟社憂向榮乃調朝恩合大軍進剿朝恩與諸將和衷決策遂於六七等年克復揚鎮二城事

聞恩綸褒嘉 賜火龍刀緞匹異數也八年授參將尋遷副將同

治元年 持擢西甯挂印總兵二年以告病回籍年六十卒於家

同上

楊仁風號薰南諸生家貧落拓弛不羈事母甚孝咸豐甲寅吳忠恕亂圍城幾殆賊領黃學勝踞北廂仁風以官命往說學勝降

海陽縣志

卷四十

列傳九

十一

爲賊黨李如珠所覺執送忠恕大罵不屈死之

同上

李從龍號雲谿父榮春諸生有善行從龍生而俊偉身長七尺嫻武略由行伍出身陞至副將歷署潮鎮潮陽惠來等營游擊咸豐甲寅之亂從龍官潮陽賊首陳娘康謀襲潮陽城伺眾無備乘晨啓城門突以其黨數百人擁入從龍聞警不及調兵率左右營卒七人持刀鼓噪而出賊眾望風皆披靡遁城賴以安潮人士爲作

紀功詩

同上

鍾鴻達號儀臣幼穎異嗜學稍長亢爽膂力過人偶試射卽入武庠事母維謹友敬諸兄遇事慷慨敢爲咸豐甲寅土匪吳忠恕亂踞意溪邨圍城幾殆鴻達乃與其兄武生英才文生靈密謀窺賊

閒說鄉人之被脅者背賊助官約既定乃遣靈微服夜渡詣城引官軍前往鄉人舉火爲應鴻達偕英才與官軍合擊一鼓平之城圍遂解論功以武擢守戎靈除訓導鴻達以武職不足展所學改通判官閩中時髮逆擾江右閩粵閒閩撫徐宗幹檄鴻達帶兵赴汀閒道克復瑞金城先後攝理詔安海澄漳浦彰化等縣及泉州馬巷廳篆中丞丁日昌少許可獨器其能以事註吏議歸家居嚴肅以正繩子弟不少貸兄靈官香山訓導性長厚有古人風

同上

李元順號甲三行伍出身咸豐元年隨王游擊某征高廉逆匪劉八李士青等有功賞七品頂戴並賞戴藍翎調赴揚州助剿七年克復鎮江拔補千總提督馮子材頗重之連年調元順堵剿丹陽

海陽縣志

卷四十

列傳九

十一

等處皆得力累保陞至副將加總兵銜同治四年金陵敕定鎮江撤防元順帶勇回籍遣散值髮逆李世賢竄陷閩漳屬縣詔安與潮鄰壤勢甚危急惠潮嘉道鳳安詳請元順赴饒屬黃岡防堵元順與鳳安商辦以詔安雖屬鄰疆有唇亡齒寒之勢力請救援於督辦東江軍務李方伯福泰爲讒口所阻詔安卒陷然時猶出兵勇與賊戰賊甚憚之不敢踰潮境稱爲小李將軍及自黃岡歸謁福泰布衣草履身佩兩刀戰血猶存福泰始歎其勇未幾髮黨四竄豐順警報又至乃調元順抵北溪壩堵剿屢戰皆捷生擒僞先鋒汪德勝閩廣肅清五年閩浙總督左宗棠檄爲泉州前營游擊嗣保奏以總兵陞用厯署桐山營游擊泉州城守營參將臺灣北

路協興化協各副將以請假歸里卒於家

同上

陳方平字敬謹號端崖咸豐辛酉拔貢有孝行父病刲股愈之官會同教諭清苦自勵以母老乞養歸生平勤學嗜古老而彌篤縣尹盧蔚猷聞其名延助修邑志未脫橐卒著有梅花書屋詩鈔

同上

海陽縣志

卷四十

列傳九

十三